



Komunikadu Imprensa
Tribunál Distritál Dili
07 Juñu 2019

Tribunál Distritál Dili indefere pedidu liberdade kondisionál hosi kondenadu krime violasaun seksuál ho agravasaun

Iha 15 Maiu 2019, Tribunál Distritál Dili deside indefere ka rejeta ba pedidu liberdade kondisionál hosi kondenadu JB ne'ebé kumpri ona metade ba pena prizaun tinan 5 hosi prizaun tinan 10 ba krime abuzu seksuál ho agravasaun hasoru lezada CdJ. Tribunál deside mantein arguidu kumpri ninia sentensa to'o remata tanba konsidera katak krime ne'ebé imputa ba arguidu aleinde estraga menór refere nia futuru no sentensa ne'e refleta arguidu ninia hahalok. Desizaun atu mentein kondenadu iha prizaun ne'e mós atu hametin persesaun sosiedade katak krime sira ho natureza violasaun seksuál nu'udar krime sériu ne'ebé labele tolera iha sosiedade.

“JSMP kongratula tribunál nia desizaun ne'ebé mantein kondenadu nia sentensa to'o remata, liuliu ba krime sira ho natureza violasaun seksuál. JSMP konkorda katak Tribunál tenke firme no rigorozu iha desizaun sira tanba krime ne'e prodús konsekuénsia grave ba vítima no hamate sira nia futuru,” dehan Luis de Oliveira Sampaio, Diretór Ezekutivu JSMP.

Iha JSMP nia monitorizasaun deskobre katak kazu ho natureza violasaun seksuál ne'ebé envolve menór sira kontinua rejista iha juridisau hotu. Tanba ne'e se tribunál konsidera kondenadu nia pedidu, bele kria presentente iha futuru no sosiedade bele hanoin katak afinál krime ho natureza violénsia seksuál hanesan krime ne'ebé simples ka krime kmaan tanba ne'e tribunál bele husik livre kondenadu mezmu nia seidak kumpri ninia sentensa totalmente no permite ba liberdade kondisionál.

Iha JSMP nia relatóriu observaun jerál ba setór justisa sira iha kada tinan sempre ejize ba tribunál atu tenke condena arguidu krime violasaun seksuál ho pena ne'ebé todan. Ida-ne'e hanesan pasu konkreta hodi proteje feto no menór sira. JSMP mós dalabarak ona rekomenda ba tribunál no ministériu públiku atu kria ‘matadalan’ ba akuzasaun no sentensa iha kazu sira ne'e hodi asegura konsisténsia iha desizaun sira.

Rua Beco Lakateu, Aldeia Manufuik,
SukuColmera, Administrativu Vera Cruz
Dili Timor Leste
PoBox: 275

Telefone: 3323883 | 77295795

www.jsmp.tl

info@jsmp.minihub.org

Facebook: www.facebook.com/timorleste.jsmp

Twitter: @JSMPtl

Tanba preokupa ho kazu abuzu seksual hasoru labarik ne'ebé aumenta buras ba bebeik, iha Janeiru 2016, JSMP apresenta pareser ida ba Parlamentu Nasionál kona-ba Prosedimentu Indultu¹. Iha paraser/submisaun ne'e JSMP rekomenda atu posivelmente esklui indultu ba tipu krime sira ho natureza violasaun seksuál sira hanesan abuzu seksuál ba menór no inestu. Rekomendasaun ne'e iha ikus hetan konsiderasaun hosi Parlamentu Nasionál iha Lei Nu. 05/2016 de 25 de Maiu kona-ba *Procedimento de Concessão de Indulto e Comutação de Pena* ne'ebé esklui duni krime ne'ebé kontra integridade fizika ka ba liberdade ema nian ne'ebé ho pena prizaun másimu hanesan ka aas liu tinan 8.²

Kazu ida ne'e rejistu iha tribunál ho Número Prosesu : 0059/14.PDDIL ho juis titulár ba prosesu ne'e maka Dra. Ana Paula Fonseca, Dra. Julmira Maria Auxiliadora no Dra. Jumiati Freitas. Enkuantu parte Ministériu Públiku hetan representasaun hosi Dr. Osorio da Deus no arguidu hetan defeza hosi Dr. Henrique João Mariz.

Atu hetan informasaun kle'an liu tan favor kontaktu:

Luis de Oliveira Sampaio
Diretór Ezekutivu JSMP
Telefone: 3323883
www.jsmp.tl

¹ Submisaun JSMP: http://jsmp.tl/wp-content/uploads/2013/03/Paraser-kona-ba-Lei-Indultu-Presidencial_TETUM.pdf

² Artigu 4 (alinea C) hosi Lei LEI Nu. 5 /2016 de 25 de Maiu kona-ba PROCEDIMENTO DE CONCESSÃO DE INDULTO E COMUTAÇÃO DE PENA